

DOPAHE TA PROHIBI: BO A USE, BO TA FOUT!

E siman aki tabata tin e informacion di tres atleta Arubiano cu a wordo suspendi di Federacion internacional di bodybuilders pasobra nan a usa doping, locual a sali na cla durante test anti-dopahe cu a ser haci na Jamaica.

A indica cu esaki lo por costa e Asociacion di Bodybuilding y Powerlifters di Aruba un multa di 2000 dollar ademas.

E doping a ser detecta den orina di e atletanan.

E test di orina a ser haci prome cu e competencianan a tuma lugar.

E informe a sali na cla tres luna despues di e campeonato debi cu e test di laboratorio a tuma lugar te na Canada.

Un di nan a laga sa di no tabata sa cu e remedi cu el a usa pa saca liquido di su curpa ta riba lista di doping di e federacion internacional. Por ta cu ta asina, pero cada atleta cu ta usa cierto remedinan y mester competi den competencianan internacional, mester por acerca nan bond, nan medico, nan dirigente pa busca na sa si e remedi ey ta valido si of no.

Ta lesa cu segun vocero di e asociacion di Aruba publicacion di number di e atletanan a kibra y perhudica e atletanan inmensamente.

Esey no ta verdad.

NAN A PERHUDICA NAN MES

E atletanan a perhudica nan mes y kibra nan mes for di momento cu nan a usa doping cu ta prohibi den deporte.

Kizas pa esun cu no tabata sa di e remedi, esaki por ta diferente, pero e tabata tin caminda di cana y busca su informacionnan prome cu el a viaha y no usa remedi pa saca liquido di curpa pa loco.

E por a sa cu na Aruba tin atleta cu a termina den hospital, na Corsow tin atleta cu a hera muri terminando tambe den hospital, na Merca un atleta cu tambe a usa remedi di saca awa for di curpa, a caba di competi pasa patras di tarima y dal abao muri di deshidratacion, otro tambe a haya atake di corazon debi na uso di dopahe.

Ta conoci cu na Aruba doping ta wordo importa di Venezuela, Merca y Hulanda. Mayoria ta bin di Hulanda, y Venezuela, segun Inspectie di remedinan y loke ta sali di e atletanan mes.

NO BAY SINTA BRINGA OTRO AWOR

E publicacion no a cay na agrado di esnan envolvi den e deporte di bodybuilding pasobra den bond mes nan ta bringa otro, e diferente Gymnan mes ta bringa otro, e atletanan mes aunke hopi menos ta bringa otro.

E asociacion no tin den dje un figura clave cu por para e uso di dopahe

pasobra esnan cu ta eligi cu ta e atletanan ta percura pa nan no eligi un persona fuerte cu sa kico ta kico y cu por para nan.

E asociacion tin cu keda sin weso di lomba na fabor di e atletanan cu kier haci y deshaci.

E tres atletanan ta perhudica di verdad, y na prome lugar ta nan mes falta di a usa dopahe, y na di dos lugar e falta ta riba e dirigentenan di e asociacion cu mester ta fuerte contra dopahe y prohibi dopahe den e deporte.

Awor no ta momento di bay sinta bringa otro y tira culpa riba otro.

Awor ta momento pa e asociacion y atletanan pone un fin na e uso di dopahe.

E tres atletanan a haya nan les.

Nan lo no por participa internacionalmente pa cierto periodo, locual si lo duel nan masha hopi, pero otronan tambe ta adverti awor cu nan tampoco mester drenta den e aventura aki.

Cada vez cu un atleta wordo haya positivo, ta e pais cu e ta representa ta haya e golpi, y number di Aruba awor ta skeiro rond mundo como isla caminda atletanan ta usa dopahe, danki na descuido di e atletanan envolvi y nan asociacion.

NOS TA TOCA SI BO POR PAGA NOS

Ayera merdia Huize Maristella a celebra carnaval cu su clientenan.

E duele grandi ta cu a laga e clientenan sinta bao di tent cu mariniernan a instala como colaboracion for di 2 or pa e fiesta cu ta termina 5 or atardi.

Tabata algo pasa di cuatro cu e banda musical cu a logra haya, a yega pa toca poco pa e clientenan, pero pa a haya e banda, trahadornan di Huize Maristella mester a mula curpa pa haya un sponsor pa paga e tarifa di banda.

For di diahuebs a busca brassband of banda pa loco y no por a haya un banda y pa otro no tabata tin placa pa paga.

Ayera cu a logra un por fin, el a presenta te 4 or ora cu e clientenan tabata morto cansa di warda.

Nos mester corda cu mañan nos tambe por termina den huize Maristella.

Nos tambe lo kier celebra manera nos grandinan ta celebra awe, y nos tambe lo kier pa un banda colabora pa nos por haya musica di carnaval.

Awor cu ASOMA a den su reorganizacion grandi, ta bon pa Sr. Elgin Juddan trece e topico dilanti relaciona cu tocamento pa caridad durante aña y durante carnaval.

Juby